

Misa Santa Anna di Noord cu dak atrobe

Gobierno y ATA no a duna loke a priminti



ORANJESTAD – E potret aki ta ilustra un bista masha positivo di e trabou di reconstruccion y reparacion di e Misa Santa Anna di Noord, despues cu na luna

di augustus ultimo su estructura a resulta seriamente dañá pa e efectonan devastador di un hos feroz. E fielnan por bisa cu orguyo cu un parti importante ta

cla, pero mester bisa cu lamentablemente cierto ayudo priminti door di Gobierno y ATA no a yega ainda.

Continuacion pagina A24

Misa Santa Anna di Noord cu dak atrobe

Gobierno y ATA no a duna loke a priminti

Continuacion di pagina 1

Un di e partinan cu a resulta seriamente afecta tabata e dak; y despues di un trabou duro, nada facil nos por aprecia cu e dak ta practicamente cla. Tur esaki ta e trofeo di un esfuerso conhunto pa logra e bunita obhetivo cu e misa masha bunita aki lo por habri su portanan pa tur creyente.

Bale la pena menciona e trabou grandi cu un grupo di boluntario di e Comision pa Recaudacion di Fondonan a realiza pa cuminsa e parti di reconstruccion y reparacion di Misa Sta. Anna.

Pero no tur cos ta cla y ainda tin trabou pendiente pa

haci. Un di nan tin di haber cu e altar palo di un balor artistico y historico incalculabel. Mirando cu e ta un joya di arte, no ta facil pa realiza un trabou di drechamento di dje.

E ta un trabou di reparacion cu ta exigí man di obra profesional, y naturalmente placa. Segun informacion cu BON DIA Aruba a compila, di tur e donacionnan cu e Comision pa Recaudacion di Fondo a ricibi danki na e actividadnan cu nan a realiza, entre otro un radio-telethon, ainda e suma cu Gobierno y Fondo pa Mehoracion di e Producto Turistico a priminti como donacion no a bira un realidad.

Nos ta papiando di un suma di 100 mil florin di gobierno di



Aruba y 25 mil di Fondo pa Mehoracion di e Producto Turistico, cu a ser priminti di boca pafo y cu te aworaki

a bira promesa so! E placa aki lo yuda pa cuminsa cu e trabou di reparacion di e altar al estilo New Gotico di

Misa Santa Anna di Noord, un obra di arte masha aprecia pa localnan y nos bishitantenan. □